



Inatsisartunut ilaasortaq
Karl Lyberth
Siumut

Najugaq qimannagu perorsaasutut ilinniartitaaneq pillugu § 37 naapertorlugu apeqqummut nr. 2011-52-imut akissut

Inatsisartut suleriaasianni § 37, imm. 1 naapertorlugu apeqqustit Naalakkersuisut 22. februar 2011-mi tiguaat. Ilulissani Perorsaanermik Ilinniarfik najugaq qimannagu perorsaasunngorniarluni ilinniartitaanermut akisussaasuvoq taamaattumillu tassaniittut qinnuigineqarput apeqqutinut makkununga oqaaseqaqqullugit. Perorsaanermik Ilinniarfimit oqaaseqaatit akissummut ataaniittumut ilanngunneqarput.

1. Najugaq qimannagu perorsaasutut (pædagog) ilinniarusuttut maannakkut qanoq periarfissaqartinneqarpat.

Akissut:

Innuttaasut najugaq qimannagu perorsaasunngorniarusuttut illoqarfinni Nuummi, Sisimiuni Ilulissanilu tamatumunnga periarfissaqarput. Tamatuma saniatigut Ilulissani Perorsaanermik Ilinniarfimi nalinginnaasumik ilinniartoqarsinnaavoq. Ilinniartut najugaq qimannagu ilinniartitaanernut qinnuteqartut tassaakkajuttarput isumaginninnermi ikiortit sulinnermi sivikinnerpaamik ukiuni pingasuni misilittagallit, kiisalu illoqarfinni pineqartuni sullissiveqarfimi sulisuusut.

Kommunit ilinniarnermi ukiunik pingasunik sivilissusilimmi ilinniartut akissarsiaannut paarlatsillu akissarsiaannut akiliisarput. Ilinniartitaaneq ima aqqissugaavoq ilinniartut piffissap ilaani atuartarlutik piffissallu ilaani sullissiveqarfimi suliffigisaminni sulisarlutik. Kommunit ininik atukkiussisarput (allaffik inillu atuartsiviit), Namminersorlutik Oqartussat inaateqanngikkaangata.

2. Illoqarfinni nunaqarfinnilu sorlarni najugaq qimannagu perorsaasutut ilinniarnert ingerlanneqarpat?

Akissut:

Maanna najugaq qimannagu perorsaasunngorniarnerit pingasut ingerlapput. Taakku Nuummi, Sisimiuni Ilulissanilu ingerlanneqarput. Ilinniartitaanerit Namminersorlutik Oqartussat, kommunit Perorsaanermillu Ilinniarfiup akornanni suleqatigiissutaapput. Taaneqartoq kingulleq ilinniartitaanernut akisussaasuvoq. Illoqarfinni taaneqartuni ukiut pingasukkuutaarlugit holdit ataatsit atualersinneqartarput. Holdit pingajuat maanna Nuummi ingerlavoq, holdit siullersaat 2004-mi aallartilluni. 2011-mi upernaap ingerlanerani Sisimiuni Ilulissanilu holdit ataatsit naammassissapput, tamatumani nunatsinni inuiaqatigiit isumaginninnermi perorsaasunik 37-nik nutaanik peqalissallutik.

03. marts 2011
Sagsnr. 2011-044291
Dok. Nr. 576538

Postboks 1029
3900 Nuuk
Tlf: +299 34 50 00
Fax: +299 32 20 73
Email: kiin@nanoq.gl
www.nanoq.gl

3. Illoqarfinni nunaqarfinnilu sorlarni najugaq qimannagu perorsaasutut ilinniarnert ingerlanneqanngillat?

Akissut:

Najugaq qimannagu perorsaasunngorniarneq illoqarfiit taaneqartut saniatigut allani ingerlanneqanngilaq, maannali Qeqqata aamma Qaasuitsup Kommunii holdinik nutaanik aallartitsinissaq pillugu isumaqatiginiarneqarput. Tamatumunnga oqaatigineqassaaq Qaqortumi najugaq qimannagu ilinniartitaanermik aallartitsiniartoqarsimammat iluatsinngitsumillii.

Sisimiuni najugaq qimannagu ilinniartitaanermi ilinniartut aamma nunaqarfimmeersut peqataapput, Nuummi holdini nutaani ilinniartut Paamiuneersut tallimaallutik.

3a. Ingerlanneqannginnerinullu suut pissutaappat?

Akissut:

Naapertuunnerpaasorineqarpoq maanna periuseq isumaqatigiissutaasullu tunngavigalugit illoqarfinni anginerusuni najugaq qimannagu holdit pillugit isumaqatigiissuteqartoqarnissaa. Periuseq pitsaasuusoq paasineqarsimavoq, ilinniartut illoqarfimmi ilinniarfigisami najugaqarlutik ilaqutaqarlutillu, kiisalu suliffimminnut ingerlaavartumik attaveqarsinnaallutik, kiisalu ilinniartitaaneq oqaatsit ilitsoqqussat atorlugit pisinnaalluni. Tamakku kinguneraat ilinniartitaanerni taamaatiinnartartut ikinnerujussuunerat.

Najugaq qimannagu ilinniartitaanert nuna tamakkerlugu ingerlanneqannginnerannut tunngavilersuutaasoq maannamut tassaasimavoq sulisussaqaarniarneq naammassisinnaasanullu tunngasut. Taamaattorli siunissami nuna tamakkerlugu ilaatigullu internetimik tunngaveqarluni najugaq qimannagu ilinniartitaanernik pilersitsisoqarsinnaanissaa mattunneqanngilaq. Periarfissat nutaat, ilinniarfik nutaaq ilinniartullu ineqarfii nutaat atorlugit ukiut tulliuttut ingerlanerini nuna tamakkerlugu najugaq qimannagu perorsaasunngorniarnernik neqerooruteqarnissamut periarfissaqalissaaq. Tamatumali tungaanut isumaqarpugut kommunit suleqatigalugit maanna periutsip ingerlaannarnissaa pitsaanerpaasoq. Taanna maannamut iluatsilluarpoq.

Inussiarnersumik inuulluaqqusillunga

Mimi Karlsen